

I valores de la solidarietà lea Fascia e Rendena

La é jita al Socors da mont de l'Auta Fascia la "Targa de arjent" del 39° pest internazionèl de solidarietà alpina de Pinzolo



Solidarietà - "Chi che sèlva na vita sèlva dut l mond" l'è scrit tel Talmud. Chesta fona paroles del liber sacher ebraich l'è fondament e stil de vita concret, da vignidi, per i omegn che i valores de la solidarietà e de l'aiut ai etres i li à ritè, vedù e touc ite ensin da picci, da l'ejempie di giaves e de la jent da mont, più che lec ti libes o scutè ti descors. Lascèr dut e jir, se l'è zachei tel pericol e se sà che se podessa i didèr, l'è la risposta naturèla, che vegn fora subito e de spontan, senza tenc de "se" o de "ma". Con empen, desponibilità, spirit de responsabilità e profesionalità, ma ence con gaissa, spirit de grop e legrèza, pur te la consupata che vèlch outa chest empen pel meter tel pericol tia medema vita.

Con chest spirit l'è nasciù la "Targa de arjent", pest internazionèl de solidarietà alpina che vegn assegnà da 39 egn en cà a Pinzolo. N pest prestigios, metù sù del 1972 dal capo de la Stazion de Socors del post Angiolino Binelli, che dō n intervent de aiut n muie grief l se à pissà che chi che se met a la leta per i etres, ence a risch de la vita, i merita ben n recognosciment emportant.

N pest che ti egn passè ge è stat dat anter l'auter al Dalai Lama (2001) e a Papa Jan Paul II (2004), ma ence a jent ladina: del 1986 a Franz Runggaldier, capo del Socors da Mont de Ortije, e del 1999 a Raffael Kostner de l'Aiut Alpin Dolomites.

L Grop de Socors de Fascia "tegn scola" te la Val Rendena

Chest an dut l Comitè de endrez a decidù a una de ge sporjer chest

pest internazionèl al Grop de Socors da Mont Auta Fascia, ajache si omegn à metù en pràtega, con cher datol, senza pissà a se estesc e ensin al sacrificie più aut de la vita, l spirit de la solidarietà che é a fondament de la "Targa de arjent". N pest che vel recognoscer mingol l'empen de duc i Gropes de socors, e che tel braciacol al Socors de Fascia l vel recordèr i 5 joegn del grop se n jic per semper e dir amò n'outa adaut che la memoria de Alex, Diego, Erwin e Luca, e ence de Dimitri, l'è e l'è a esser ejempie e stimol per jir inant dō chesta strèda, che vèlch outa la é senestra ma de segur l'è chela giusta.

Chest ejempie i voluntadives fascegn i l'è portà ence ai bec e ai joegn de la Val Rendena. L di dant da la consegna del pest, l capo de la Stazion Gino Comelli ensema con Sergio Valentini, che aea tout pèrt a chel desgrazià intervent de socors e l se à salvà, i é jic te la scoles de Pinzolo e Caderzone, olache i ge à moscià ai bec n filmat su l'intervent de socors e dapo i à responet a la fila de domanes, portan dant sia esperienza, sia profesionalità, sia motivazion e forza morala, socedan ti joegn del post la medema gaissa che se à jà vedù ence te val te chest ultim an, canche la domanes de nesc joegn de poder jir a fèr pèrt del socors é states più che i posc desponiboi.

Na cièria de confort, sostegn e aprijament per l'urier portà dant che é segur emportà n Grop che te n an à perdù 5 de si voluntadives, e anterite l'è ence cognù fèr front a critiches e polemiches. Per chest duta la comunanza de Fascia à volù ge palesèr amò n'outa so reingraziament più fort a chest Grop de voluntadives e a so capogrop Gino



Comelli, e en sabeda passèda de fascegn a Pinzolo n'era dassen n muion. E se l temp no l'è stat proprio de gran aiut, la giornèda é stata forta e ciarièda de segnificac fogn, e l leam anter i omegn da mont de Fascia e chi de la Val Rendena, nasciù e vivènt dal divider e viver concretament i medemi valores, l'è stat ciolà amò più strent da don Stefan Maffei, l preve de Cianacei, Dèlba e Penia che vegn apontin da Pinzolo.

La comunanza de Fascia à "empien" Pinzolo

La geja parochiala de Pinzolo la era piena rèsa de jent per la messa che à avert la giornèda, e n muie de chela jent ruèda da Fascia. Don Stefan Maffei l'è ofizièda con gran emozion te "sia" geja de Sèn Lorenz, ensema a don Ivan Maffei, ence el fi de chela val e ades "a la foresta" a Roma, e l se à tout dō da Fascia ensinamai i servidores e l cor, che à compagnà con braura la zelebrazion. Paroles fones de recordanza per nesc joegn che à lascià sia vita per didèr i etres e per chi valores de solidarietà che lea la doi comunanzas de jent da mont, à tocià l cher, e sentir ressonèr l lengaz ladin te na geja belebon dalonc da noscia val à socedà amò maor emozion.

A rapresentèr la Val de Fascia, ensema al Grop de Socors de la Val de Sora, l'è ruà te la Val Rendena la Procuradora Cristina Donei, i ombolc de val o si rapresentanc, l conseier Luigi Chiocchetti, e dapo l Grop de Folclor de Cianacei, la Musega Auta Fascia, l Grop de la Paic e n muie de jent, dant da dut parènc e amisc de Alex, Diego, Erwin e Luca.

Dò messa i Gropes de folclor e

musega à portà si colores e si sons te piaz fora de geja, e ajache la pievia à lascià mingol rechia duc en defilèda i é rué ensin te piaz per la zerimonia ofizièla.

Chiò l cavalier Angiolino Binelli, ideator del pest, ge à consegnà la Targa de Arjent al capo de la Stazion de Socors de l'Auta Fascia Gino Comelli. Chest pest - à dit Comelli emozionà - l'è la conferma che chel che fazon l'è giust, e ence se vèlch outa pel vegnir falà vèlch, nos cognon jir inant coscita. L'ombolt de Pinzolo William Bonomi à recordà i cater joegn de la Val Lasties ma ence duta la comunanza de Fascia, che à desmostrà gran forza e coraje ence te chesta desgrazia.

Paroles de salut e de aprijament é ruèdes da man del senator Giacomo Santini e dapo l reingraziament per i Gropes de Socors, apede che per la comunanza de Pinzolo, col Comun, l Comitè e duc chi che deida la realizazion de chesta scomenzadiva, é states sportes dai ombolc de Cianacei e de Ciampedel Mariano Cloch e Renzo Valentini.

Tel cors de zerimonia l'è stat consegnà ence la meda de òr en recort di omegn che à perdù la vita tel portèr aiut ai etres: l braciacol e l batiman de la piazza é jic ai familiars de cater morc te la desgrazia del jolier vin Ampez: Stefano Da Forno, Fabrizio Spaziani, Marco Zago e Dario de Filip, e de l'alpinist l'andèis Ger McDonnell, mort sul K2 per chierir de portèr didament a na spedizione coreana. De teritories leé te la solidarietà ence sorafora i confins, anter Dolomites de Fascia, de Belun e del Brenta, à rejonà l president de la Provincia de Trent Lorenzo Dellai, che à uzà fora l besegn che



chisc valores, che fèsc pèrt de la storia de noscia tera, i sie e i seghite a esser a fondament de ogni scelta e ogni politica che vegn portèda inant da noscia istituzioni e amministrazioni, ajache se chest no sozede, se al post de chisc valores ciapa pe valores desferenc desche chi de l'individualism, noscia autonomia la joassa dalbon a pech.

Lucia Gross



Autoritàdes, gropes de folclor e de voluntariat, ensema con don Stefan Maffei se à strent dintorn l Grop de Socors de la Val de Sora e so capogrop Gino Comelli premià a Pinzolo co la "Targa de arjent".



10 EURO

Chel che te compres anché l vèl 10 Euro doman!

Dai 11 de ottober ai 30 de november
www.fassacoop.it/offerte

FASSA COOP
CENTER

Coprativa Val de Fascia
a Sèn Jan - tel. 0462.761211
www.fassacoop.it